

四庫全書

子部

# 欽定四庫全書

子部  
冊府元龜卷四百二十六  
四至

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣金光悌

謄錄監生臣黃廷璧

欽定四庫全書

冊府元龜卷四百二十四

宋 王欽若等撰

將帥部

死事

古之謂死有重於泰山有輕於鴻毛者蓋慮乎不得其所也若乃委質以事君陳力而就列有死無貳乃其分焉矧夫處分間之任總貞師之寄所以式遏寇虐作固垣翰夾輔宗社保障黎元誠安危之注意而委賴之尤

重者也乃有遘難虞之會當討擊之際純心內激拳勇  
外發執金鼓而作氣冒矢石而無憚奮不顧身淪於鋒  
刃其或失先聲後實之效當彼衆我寡之勢戰則奔潰  
守則淪覆而能執心不撓握節自誓捐軀死難沒而益  
榮此所謂執戈衛社隕首無悔者矣

晉狼暉為戎右魯文公二年秦師伐晉晉侯禦之及秦  
師戰于彭衙秦師敗績初戰於殽也晉梁弘御戎萊駒  
為右戰之明日晉襄公縛秦囚使萊駒以戈斬之囚呼

萊駒失戈狼暉取戈以斬囚禽之以從公乘遂以為右

箕之役

在僖公三十三年

先軫黜之而立續簡伯狼暉怒其友

曰盍死之暉曰吾未獲死所其友曰吾與女為難

欲共殺先

軫

暉曰周志有之勇則害上不登於明堂死而不義非

勇也共用之謂勇吾以勇求右無勇而黜亦其所也謂  
上不我知黜而宜乃知我矣子姑待之及彭衙既陳以  
其屬馳秦師死焉晉師從之大敗秦師君子謂狼暉於  
是乎君子詩曰君子如怒亂庶遄沮又曰王赫斯怒爰

整其旅怒不作亂而以從師可謂君子矣

樂鍼為戎右荀偃將中軍襄十四年夏諸侯之大夫從

晉侯伐秦鄭司馬子僑帥鄭師以進師皆從之至於櫟

林

櫟林秦地

不獲成焉

秦不服

荀偃令曰雞鳴而駕塞井夷竈

示不反

唯余馬首是瞻

言進退從已

樂廩曰晉國之命未是有

也余馬首欲東乃歸

樂廩惡偃自專故棄之

下軍從之左史謂莊子

曰不待中行伯乎

中行伯荀偃也莊子魏絳也左史晉太史

莊子曰夫子命

從帥

夫子謂荀偃

樂伯吾帥也吾將從之從帥所以待夫子

也

以從命為待也樂縶下軍帥莊子為佐故曰吾帥

伯游曰吾今實過悔之何

及多遺秦禽

軍帥不和恐多為秦師所禽獲

乃命大還晉人謂之遷延

之役

遷延却退

欒鍼曰此役也報櫟之敗也役又無功晉之

恥也吾有二位於戎路

欒鍼欒縶弟也二位謂縶將下軍鍼為戎右

敢不

恥乎與士鞅馳秦師死焉

魯公叔禺人昭公子也魯與齊戰于郎

郎魯近邑也哀十二年齊國書

帥師伐我是也公叔禺人遇負杖入保者息

遇見也見走辟齊師將入保罷倦扳

其杖頭上兩手掖至休息者保縣邑小城禺人昭公之子春秋傳曰公叔務人

曰使之雖病也

謂時

任之雖重也

謂時

君子不能為謀也士弗能死也

不可

君子謂卿大夫也魯政既惡復無謀臣士又不能死難與人恥之

我則既言矣

敵

齊師踐其言

與其鄰重汪錡皆往死焉

奔敵死齊寇隣里也重皆當為童未寇者

之稱姓汪名錡隣或為談春秋傳曰童汪錡

魯人欲勿殤重汪錡

見其死君事有士行

欲以成人之喪喪之言魯人者死君事國為飲葬

問于仲尼仲尼曰能執干戈

以衛社稷雖欲勿殤也不亦可乎

善之

魯哀公十一年公會吳伐齊齊國書將中軍高無平將

上軍宗樓將下軍陳僖子謂其弟書爾死我必得志

書子



占也欲獲死事之功

宗子陽與閭丘明相厲也

相勸厲致死子陽宗樓

桑掩

胥御國子

國子國書

公孫夏曰二子必死

亦勸人

將戰公孫夏

命其徒歌虞殯

虞殯送葬歌曲示必死

陳子行命其徒具含玉公

孫揮命其徒曰人尋約吳髮短

約繩也八尺為尋吳髮短欲以繩貫其首

東

郭書曰三戰必死于此三矣

三戰夾儀五氏與今

使問弦多以琴

弦多齊人六年齊魯問遺

曰吾不復見子矣

言將戰死

陳書曰此行也吾

聞鼓而已不聞金矣

鼓以進軍金以退軍不聞金言將死

戰于艾陵大

敗齊師獲國書公孫夏閭丘明陳書東郭書

楚大夫史皇吳伐楚楚師亂吳師大敗子常奔鄭史皇

以其乘廣死

以戰死

漢周苛為御史大夫高祖令與樅公守滎陽三年項羽

引兵西拔滎陽城生得周苛羽亨周苛

亨謂煮而殺之

并殺樅

公

紀通以將軍從高祖擊破秦入漢定三秦戰好時死事

封子通為襄平侯

灌孟吳楚反時潁陰侯灌嬰為將軍屬太尉

時潁陰侯是灌嬰之

子名何轉寫  
誤為嬰耳

孟為校尉戰常陷堅遂死吳軍中

韓千秋故濟北相武帝元鼎四年南粵相呂嘉為亂天  
子遣千秋往入粵境破數小邑未至番禺四十里粵以  
兵擊千秋等滅之於是天子曰韓千秋雖亡成功亦軍  
鋒之冠封其子延年為成安侯

後漢叔壽為破虜大將軍光武建武元年擊五校賊於

曲梁戰歿

曲梁屬廣平國  
今維州縣也

劉植為驍騎將軍建武二年更封昌城侯討密縣賊戰破

溫序為護羌校尉行部至襄武為隗囂別將苟宇所拘。叔宇謂序曰：子若與我并威同力，天下可圖也。序曰：受國重任，分當致死。義不貪生，苟背恩德。宇等復曉譬之。序素有氣力，大怒叱宇等曰：虜何敢迫脅漢將！因以節撻殺數人。賊眾爭欲殺之。宇止之曰：此義士守節，可賜以劔。序受劔，銜鬚於口。顧左右曰：既為賊所迫，殺無令鬚汙土。遂伏劔而死。

劉尚為武威將軍，擊武陵五溪蠻夷，深入軍沒。

傳育為護羌校尉章帝元和三年胡羌叛出塞更依迷  
吾章和元年育上請發隴西張掖酒泉各五千人諸郡  
太守將之育自領漢陽金城五千人合二萬兵與諸郡  
尅期擊之命隴西兵據河南張掖酒泉兵遮其西並未  
及會育軍獨進迷吾聞之徙廬落去育選精騎三千窮  
追之夜至建威南三兜谷去虜數十里湏旦擊之不設  
備迷吾乃伏兵三百人夜突育營營中驚壞散走育下  
馬手戰殺十人而死

張顯為漁陽太守殤帝延平元年鮮卑復寇漁陽顯率數百人出追之兵馬掾嚴授諫曰前道險阻賊勢難量宜且結營先令輕騎偵視之顯意甚銳怒欲斬之因復進兵遇虜伏發士卒悉走唯授力戰身被十創手殺數人而死顯中流矢主簿衛福功曹徐咸皆自投赴顯俱歿於陣鄧太后策書褒歎賜顯錢六十萬以家二人為郎授福咸各錢十萬除一子為郎

仲光為右扶風安帝元初二年與安定太守杜恢京兆

虎牙都尉耿溥與先零羌戰於丁奚城光等大敗並沒  
蔡諷為遼東太守建光元年四月濊貊復與鮮卑寇遼  
東諷追擊戰歿

成嚴為雲中太守建光元年秋鮮卑兵至鞬復畔寇居  
庸關嚴擊之兵敗功曹陽穆以身捍嚴與俱戰歿

李超為代郡太守順帝永建元年八月鮮卑寇代郡超  
戰歿

馬賢為征西將軍陽嘉五年且凍傳難種羌反叛以騎

都尉耿叔副賢將兵十萬屯漢陽羗寇武都燒隴關掠  
苑馬六年春賢將五六十騎擊之到射姑山賢軍敗賢  
及二子皆戰歿順帝愍之賜布三千疋穀千斛封賢孫  
光為武陽亭侯租入歲百萬

趙冲為武威太守督河西四郡兵馬建康元年追叛羗  
到建威鷁陰河軍度竟所將降胡六百餘人叛走冲將  
數百人追之遇羗伏兵與戰歿冲雖身死而前後多所  
斬獲羗繇是衰耗



尹耀為揚州刺史建康元年八月揚徐盜賊范容周生等寇掠城邑九月耀與九江太守鄧顯討范容等於歷陽軍敗耀顯為賊所沒

倪式為九真太守桓帝永壽三年居風令貪暴無度縣人朱達等及蠻夷相聚攻殺縣令衆至四五百人進攻九真式討之戰死詔賜錢六十萬拜子二人為郎

劉岱為兖州刺史獻帝初平三年青州黃巾衆百萬入兖州岱戰死

鮑信為濟北相迎曹公領兗州牧會黃巾大眾入州界  
曹公以賊將勝而驕故設奇兵挑擊於壽張先與信出  
行戰地後步軍未至而卒與遇遂接戰信殊死戰以救  
曹公信得潰圍出然信遂沒時年四十有一賊退走購  
求信喪不得眾乃刻木如信形狀祭而哭焉

張濟為驃騎將軍討呂布屯兵弘農士卒饑餓南攻穰  
為流矢所中死

魏夏侯淵為征西將軍守漢中漢建安二十三年劉備

軍陽平關淵率諸將拒之相守連年二十四年正月備  
夜燒圍鹿角淵使張郃護東圍自將輕兵護南圍備挑  
郃戰郃軍不利淵分所將兵半助郃為備所襲淵遂戰  
死謚曰愍侯初淵雖數戰勝太祖嘗戒曰為將當有怯  
弱時不可但恃勇也將以勇為本行之以智計但知任  
勇一匹夫敵耳

衛茲陳留人也太祖至陳留始與茲相見遂同盟計興  
武事令兵三千人從太祖入滎陽力戰終日失利身沒

龐德為立義將軍討關羽戰沒被殺後鍾會平蜀前後鼓吹迎德屍喪還鄴冢中身首如生

趙昱為廣陵太守賊笮融從臨淮見討迸入郡界昱將兵拒戰敗績見害

韋康為涼州刺史為馬超所圍堅守歷時救軍不至遂為超所殺

孫觀為青州刺史從征孫權於濡須口為流矢所中穿左足力戰不顧武帝勞之曰將軍被瘡深重而猛氣益

奮及瘡甚遂卒

曹攄為襄陽太守征南司馬值天下亂攄討賊句吳戰敗死

蘇尚為將軍隸并州刺史畢軌明帝青龍元年鮮卑軻比能誘納步度根使叛并州與結和親自勒萬騎迎其累重於陁北軌遣尚及將軍董弼等擊之比能遣子將騎與尚等會戰於樓煩臨陣害尚弼

張郃為左將軍加特進諸葛亮出祁山詔郃督諸將西

至雒陽城亮還保祁山郤追至木門與亮軍交戰飛矢

中郤右膝薨謚曰壯侯

亮軍退司馬宣王使郤追之郤曰軍法圍城必開出路歸軍勿

追宣王不聽郤不得已遂追蜀軍乘高布伏弓弩亂發矢中郤髀

弓遵為帶方郡太守景初中樂浪部從事吳林以樂浪本統韓國分割辰韓八國以與樂浪吏譚轉有異同臣智激韓忿攻帶方郡崎離營遵與樂浪太守劉茂興兵伐之遵戰死二郡遂滅韓

蜀龐統為軍師中郎將從先主入蜀進圍雒縣統率衆

攻城為流矢所中卒時年三十六

關羽為前將軍率眾攻曹仁於樊孫權先遣使為子索羽女羽罵辱其使不許婚權大怒又南郡太守麋芳在江陵將軍傅士仁屯公安素皆嫌羽輕已自羽之出軍芳仁供給軍資不悉相救羽言還當治之芳仁咸懼不安於是權陰誘芳仁芳仁使人迎權而曹公遣徐晃救曹仁羽不能克引軍退還權已據江陵盡虜羽士眾妻子羽軍遂散權遣將逆擊羽斬羽及子平于臨沮

權遣將軍

擊羽獲羽及子平權欲活羽以敵劉曹左右曰狼子不可  
養為害曹公不即除之自取大禍乃議徙都今豈可生  
之乃斬

張南為將軍從先主征吳與馮習俱死

龔祿字德緒為越雋太守隨丞相亮南征為蠻夷所害  
時年三十一

王士字義彊丞相亮南征蠻為益州太守將南行為蠻  
夷所害

趙廣為牙門將隨姜維沓中臨陣戰死



張疑為盪寇將軍魏狄道長李簡密書請降衛將軍姜維率疑等因簡之資以出隴西既到狄道簡悉率城中吏民出迎軍軍前與魏將徐質交鋒疑臨陣殞身然其所殺傷亦過倍既亡封長子瑛西鄉侯次子護雄襲爵向朗為中領軍後主延熙三年征漢蠻夷被害

諸葛瞻為行都護衛將軍景耀六年魏征西將軍鄧艾伐蜀自陰平繇景谷道旁入瞻督諸軍至涪停住前鋒破退還住綿竹艾遣書誘瞻曰若降者必表為瑯邪王

瞻怒斬艾使遂戰大敗臨陣死時年三十七衆皆離散  
艾長驅至成都瞻長子尚與瞻俱沒

李球為羽林右部從諸葛瞻拒鄧艾臨陣授命死于綿  
吳陳武字子烈從孫策征討有功策破劉勲多得廬江  
人料其精銳乃以武為督所向無前尤為大帝所親愛  
數至其家累有功勞進位偏將軍建安二十年從擊合  
肥奮命戰死大帝哀之自臨其葬

蔣欽領兵拒劉備有功還赴南郡與魏交戰臨陣卒

徐琨為平虜將軍後從討黃祖中流矢卒

張悌與諸葛靚之禦晉兵也吳師大敗諸葛靚與五六百人退走使過迎悌悌不肯去靚自往牽之謂曰且夫天下存亡有大數豈卿一人所知如何故自取死為悌垂涕曰仲恩今日是我死日也且我作兒童時便為卿家丞相所拔嘗恐不得其死負名賢知顧今以身徇社稷復何遁邪莫牽曳之如是靚流淚放之去百餘步已見為晉軍所殺

留贊為左將軍孫峻征淮南授贊節拜左護軍未至壽春道路病發峻令贊將軍重先還遇伏兵與戰死之

晉楊欣為涼州刺史咸寧四年與虜若羅拔能等戰于武威敗績死之

周處為建武將軍惠帝永平六年氏帥萬年僭號稱帝遣處與安西將軍夏侯俊等討之處及萬年戰於六陌

王師敗績處死之

時衆寡不敵臨陣慷慨奮不顧命以身殉國力戰而歿贈平西將軍

索靖為始平內史及趙王倫篡位靖應三王義舉以左

衛將軍討孫秀有功加散騎常侍遷後將軍太安末河  
間王顥舉兵向維陽拜靖使持節監維城諸軍事游擊  
將軍領雍秦涼義兵與賊戰大破之靖亦被傷而卒追  
贈太常

曹攄為襄城太守懷帝永嘉二年為高密王簡征南司  
馬其年流人王道等聚衆屯冠軍寇掠城邑簡遣參軍  
崔曠討之令攄督護曠曠姦人也譎攄前戰期為後  
繼遁而不至攄獨與道戰于酈縣軍敗死之

路述為河東太守永嘉二年七月劉元海寇平陽太守  
宋抽奔京師述力戰死之

王粹為鄴郡太守永嘉二年十一月石勒寇鄴郡粹戰  
敗死之

王賦為安北將軍永嘉二年石勒寇鄴郡

王堪為車騎將軍石勒襲白馬堪死之

宋抽為征虜將軍永嘉四年七月劉聰從弟曜及其將  
石勒圍懷詔抽救之為曜所敗抽死之

崔曠為襄城太守永嘉四年十月石勒陷襄城曠遇害  
郭察為安城太守永嘉五年五月益州流人汝班梁州  
流人蹇撫作亂於湘州虜刺史苟眺南破零桂諸郡東  
掠武昌安城察與邵陵太守鄭融充陽內史滕育並遇  
害

郝詵為平北將軍劉琨部將永嘉五年七月石勒寇冀  
州劉粲寇晉陽詵帥衆禦粲詵敗績死之

李暉為龍驤將軍愍帝建興元年四月石勒寇冀州上

白惲死之

賈疋愍帝時為驃騎將軍雍州刺史封酒泉公時諸郡  
百姓饑饉白骨蔽野百無一存疋帥戎馬二萬餘人將  
伐長安平西太守竺恢亦固守劉粲聞之使劉曜劉雅  
及趙染距疋先攻恢不尅疋邀擊大敗曜中流矢退走  
疋追之至于甘泉旋自渭橋襲瀘水胡彭蕩仲殺之遂  
迎秦王奉為皇太子後蕩仲子夫護帥羣胡攻之疋敗  
走夜墮于澗為夫護所害疋勇略有志節以興復晉室



為已任不幸顛墜時人咸痛惜之

魏浚為揚威將軍河南尹劉曜忌浚得衆率衆軍圍之  
劉演郭默遣軍來救曜分兵逆於河北乃伏兵深隱處  
以邀演默軍大破之盡虜演等騎浚夜遁走為曜所得  
遂死之追贈平西將軍

華化字長風為征虜將軍討汲桑戰沒

陶侃之子與果烈善戰為武威將軍後與杜弢戰與被  
重創卒侃哭之慟曰喪吾家寶三軍皆為之垂泣詔贈

長沙太守

趙誘為王敦參軍加廣武將軍與甘卓周訪共討華軼破之又擊杜弢於西湘元帝大興初復與卓攻弢滅之為武昌太守時杜曾迎第五猗於荊州作亂敦遣誘與襄陽太守朱軌陵江將軍黃峻共拒之猗既愍帝所遣加有時望為楚所歸誘等苦戰皆死之敦甚悼惜之表贈征虜將軍秦州刺史子龔與誘俱死

陳超為平北將軍祖逖督護大興二年冬十月逖遣超

襲石勒將挑豹超敗沒於陣

司馬玖為將軍明帝太寧元年春李雄使其將李驤任  
回寇臺登玖死之

羊曼為前軍蘇峻之亂曼率文武守雲龍門王師不振  
或勸曼避峻曼曰朝廷破敗吾安所求生勒衆不動為  
峻所害年五十五峻平追贈太師

楊術為朱提太守成帝咸和二年正月寧州秀才龐遺  
起義兵攻李雄將任回李謙等雄遣其將羅恒費黑救之

寧州刺史尹奉遣裨將姚岳與術援遣戰于臺登岳等  
敗績術死之

孟彥為舟川守將咸康六年三月李壽陷舟川彥與劉  
齊李秋皆死之

毛寶為征虜將軍咸康中石季龍將襲安李農陷沔南  
張貉陷邾城因寇江夏義陽寶及西陽太守樊俊義陽  
太守鄭進並死之

沈勁少負志節穆帝升平中慕容恪侵逼山陵時冠軍

將軍陳祐守雒陽衆不過二千勁自表求配祐效力因以勁補冠軍長史令自募壯士得千餘人以助祐擊賊頻以寡制衆而糧盡援絕祐懼不能保全會賊寇許昌祐因以救許昌為名興寧三年留勁以五百人守城祐率衆而東會許昌已沒祐因奔崖塢勁志欲致命欣獲死所尋為恪所攻城陷被執神氣自若恪奇而將宥之其中軍將軍慕容虔曰勁雖奇士觀其志度終不為人用今若赦之必為後患遂遇害恪還從容言於慕容暉

曰前平廣固不能濟辟閭今定維陽而殺沈勁實有愧於四海朝廷聞而嘉之贈東陽太守

李福為潁川太守興寧二年春慕容暉將慕容襲許昌福死之

吉挹字冲祖孝武初為魏興太守輕車將軍以拒苻堅堅將韋鍾攻魏興挹遣衆拒之斬七百餘級加督五郡軍事鍾率衆欲趣襄陽挹又邀擊斬五千餘級鍾怒迴軍圍之挹又屢挫其銳其後賊衆繼至挹力不能抗城

將陷引刀欲自殺其友止之曰且苟存以展他計為計  
不立死未晚也挹不從友人逼奪其刀衆賊執之挹閉  
口不言不食而死

韋簡為東平太守太元十九年十月慕容垂遣其子惡  
奴寇廩丘簡及垂將尹國戰于平陸簡死之

袁山松為吳郡太守孫恩作亂山松守滬瀆城城陷被  
害

謝琰為會稽內史時孫恩作亂琰不設備恩奄至山陰

北三十五里琰遣參軍劉宣之拒破恩既而上黨太守張虔碩戰敗羣賊銳進人情震駭咸以宜持重嚴備且列水軍於南湖分兵設伏以待之琰不聽既至尚未食琰曰要當先滅此寇而後食耳跨馬而出廣武將軍桓寶為前鋒摧鋒陷陣殺賊甚多而塘路近狹琰軍魚貫而前賊於艦中傍射之前後斷絕琰至千秋亭敗績琰帳下都督張猛於後斫琰馬琰墮地與二子肇峻俱被害寶亦死之



周虓字孟威寧康中鎮于巴西為苻堅所獲守節不屈  
堅使者清道虓躬治達陌謂使者云煩君語氏賊苻堅  
何至取國士如此堅聞之曰貉子正欲覓死殺之適足  
成其名耳乃苦加拷撻不食而死

檀斌為兗州刺史石勒將瞻攻陷鄒山斌死之

前趙韋忠為劉聰鎮西大將軍平羗校尉討叛羗矢盡  
不屈節而死

前燕呂護為慕容暉將奔于晉尋復叛歸于暉待之如

初因遣傅顏與護率衆據河陰顏北襲勃勒大獲而還  
護攻雒陽中流矢而死

後秦楊佛嵩姚興時為都督嶺北討虜諸軍安遠將軍  
雍州刺史率嶺北見兵以討赫連勃勃嵩發數日興謂  
羣臣曰佛嵩驍猛果銳每臨敵對寇不可制抑吾嘗節  
之配兵不過五千今衆旅既多遇賊必敗今去遠追之  
無及吾深憂之其下咸謂不然佛嵩果為勃勃所執絕  
吭而死

姚平為姚泓後將軍時仇池公楊盛攻陷祁山執建節  
王總遂逼秦川泓遣平救之盛引退姚嵩與平追之及  
于竹嶺姚讚率隴西太守姚秦都雒陽太守王煥以禁  
兵赴之讚至清水嵩為盛所敗嵩父秦都王煥皆戰死  
趙元為姚泓征南姚洸部將洸鎮雒陽時宋高祖為晉  
太尉總大軍伐泓檀道濟次成臯元謂洸曰元受三帝  
重恩當守正死耳但明公不用忠臣之言為姦孽所誤  
後必悔之亦無及耳會陽城成臯滎陽武牢諸城悉降

道濟等長驅而至元與晉將毛德祖戰于栢谷以衆寡不敵而敗被創十餘據地大呼元司馬騫鑒冒刃抱元而泣元曰吾瘡已重君宜速去鑒曰若將軍不濟當與俱死去將何之皆死於陣

姚洽為姚紹左長史時晉軍伐泓紹率姚鸞等步騎五萬距王師于潼關檀道濟固壘不戰紹分道置諸軍為犄角之勢遣輔國胡翼度據東京武衛姚鸞營于大路與晉軍相接沈林子簡精銳銜枚夜襲之鸞衆潰戰死

士卒死者九千餘人紹遣洽及姚墨蟲等騎三千屯于河之九原欲絕道濟諸縣祖輸洽辭曰夫小敵之堅大敵之擒今兵衆單弱而遠在河外雖明公神武然鞭短勢殊恐無所及紹不聽沈林子率衆八千要洽於河上洽戰死衆皆沒

後梁壘澄仕呂光為酒泉太守時沮渠蒙遜叛蒙遜從兄男成先為將軍守晉昌聞蒙遜起兵逃奔貲虜扇動諸夷衆至數千進攻祿福建安寧戎護軍趙策擊敗之

男成退屯樂涇澄率將軍趙策趙陵步騎萬餘討男成于樂涇戰敗澄策死之

宋孟龍符為龍驤將軍廣川太守高祖伐慕容超令龍符統步騎為前鋒軍達臨朐與賊爭水龍符單騎衝突應手破散即據水源賊遂退走龍符乘勝奔之後騎不及賊數千騎圍繞攻之龍符奮稍接戰每一合輒殺數人衆寡不敵遂見害

劉虔之為江夏相高祖西征司馬休之魯宗之等遣參

軍檀道濟朱超石步騎出襄陽虔之率州郡兵力出鄖城屯三連立木橋聚糧以待道濟等積日不至為宗之子軌所襲眾寡不敵參軍孫長庸流涕勸退軍虔之厲色曰我仗順伐罪理無不克如其不幸命也戰敗見殺追贈梁秦二州刺史

徐達之尚高祖長女為振威將軍討司馬休之使統軍為前鋒配以精兵利器事尅當即授荊州休之遣魯宗之子軌擊破之於陳見害追贈中書侍郎

孟係祖為殿中將軍大明二年後魏侵青冀孝武遣軍援之係祖自占求行戰於杜梁挺身入陣所殺狼藉遂見殺詔書追贈郡太守

桓詢為積弩將軍梁山之役力戰為流矢所中死追贈冀州刺史

鄭墨淮西人太始元年晉安王子勛與豫州刺史殷琰同逆墨以前奉朝請率子弟部曲及淮右諸部起義於陳郡城有衆一萬明帝以為司州刺史後虜寇淮戰敗



見殺追贈冠軍將軍

韋山松為益州刺史劉秀之中兵參軍南譙王義宣據  
荆江為逆徵兵于秀之秀之遣山松萬人襲江陵出峽  
竺超民遣將席天生逆之山松一戰即梟其首進至江  
陵為魯爽所敗山松見殺

劉勔為尚書右僕射中領軍桂陽王休範為亂奄至京  
邑加勔使持節領軍署佐吏鎮扞石頭既而賊眾屯朱  
雀航南右軍王道隆率宿衛向朱雀航聞賊已至急信

召勦勦至命閉航道隆不聽促勦渡航進戰率所領于  
析南戰敗臨陣死之時年五十七事平贈散騎常侍司  
空本官如故

卜伯興為殿中將軍泰始初領僮擊南賊于赭圻戰沒  
劉康祖為佐將軍聞魏軍寇壽陽自虎牢率七千人來  
赴魏軍至者八萬騎康祖令軍曰顧望者斬首轉步者  
斬足士皆用命賊死者萬餘血流沒踝流矢貫頸墮馬  
死



冊府元龜卷四百二十四

欽定四庫全書

冊府元龜卷四百二十五 宋 王欽若等撰

將帥部

死事第二

南齊成買為軍主戍甬城太祖建元三年魏寇淮陽圍  
甬城買謂人曰我今作甬城戍我兒當得一子或問其  
故買曰甬城與虜同岸危險具多我豈能使虜不敢南向  
我若不沒虜則應破虜兒不作孝子便當作世子也至

是魏圍買數重帝遣領軍將軍李安民為都督救之勅周盤龍曰甬城漣口賊始復進西道便是無賊卿可率馬步下淮陰就李領軍鍾離船少正可致依仗數日糧軍人挾淮步下也買與魏拒戰手所傷殺無數晨朝早起手中忽有數升血其日遂戰死

張佛護為驍騎將軍崔慧景舉兵奉江夏王寶玄向闕臺遣佛護及直閣將軍徐元稱屯騎校尉姚景珍西中郎將軍徐景知遊盪軍主董伯珍騎官桓靈福等據竹里

為數城寶玄遣信謂佛護曰身自還朝君何意苦相斷  
遏佛護荅曰小人荷國重恩使於此創立小戍殿下還  
朝但自直過豈敢干齡遂射慧景軍因戰惠景子覺及  
崔恭祖領前鋒皆傖楚善戰又輕行不爨食以數舫沿  
江載酒食為軍糧每見臺軍城中煙火起輒盡力攻擊  
臺軍不復得食以此饑困元稱等議欲降佛護不許十  
二日恭祖等復攻之城陷佛護單馬走追得斬首

尹畧為遊擊將軍武帝永明八年討巴東王子響見害

贈輔國將軍梁州刺史

席謙父恭穆任鎮西司馬為魚復侯所害及謙為新蔡太守鎮湓城聞梁王義師東下曰我家世忠貞殞死不  
二為陳伯之所殺

梁韋粲為衡州刺史武帝太清三年侯景反至京師與  
司州刺史柳仲禮高州刺史李遷仕帥軍入援粲仲禮  
分據南岸正月丁巳賊濟軍於青塘襲破粲營粲拒戰  
而死戊辰李遷仕天門太守樊文皎進軍青谿東為賊



所破文皎死之

杜岸為平北將軍北梁州刺史請襲襄陽元帝許之岸乃晝夜兼行先往攻其城不剋岳陽王至遂走依其兄嶽於南陽嶽時為南陽太守岳陽王尋遣攻陷其城岸及嶽俱遇害

胡僧祐為車騎將軍西魏寇至元帝以僧祐為都督城東諸軍事魏軍四面起攻百道齊舉僧祐親當矢石晝夜督戰獎勵將士明於賞罰衆皆感之咸為致死所向

推殄賊莫敢前俄而中流矢卒

裴之橫為吳興太守江陵既陷北齊遣上黨王高渙挾  
貞陽侯明攻東關晉安王承制以之橫為使持節鎮北將  
軍徐州刺史都督衆軍給鼓吹一部出守蘄城之橫營  
壘未周而魏軍大至兵盡矢窮遂於陣沒贈侍中司空  
裴畿為太子右衛率雋州刺史西魏攻陷江陵畿力戰  
死之

陳馬明字世朗梁元帝時為散騎常侍北兖州刺史領

廬江太守荊州陷沒歸於高祖紹泰中復官位封西華  
縣侯隨周文育督征王琳於沌口軍敗明力戰死之贈  
使持節征西將軍郢州刺史

周鐵虎為嚴威將軍初自梁歸於陳尋隨周文育於江  
南拒蕭勃嘗為前軍文育又命鐵虎偏軍於苦竹灘襲  
勃前軍歐陽頎又隨文育西征王琳於沌口敗績鐵虎  
與文育侯安都並為琳所擒琳引見諸軍將與之語唯  
鐵虎辭氣不屈故琳盡宥文育之徒獨鐵虎見害

陳詳為神威將軍吳州刺史天嘉五年周逵復出臨川  
乃以詳為都督率水部討逵軍至南城與賊相遇戰敗  
死之

始興昭烈王道談高祖兄也仕於梁世為東宮直後主  
帥侯景之亂領弩手三千援臺城中流矢卒

後魏魏勤封永安侯明元永興五年與將軍元屈會稽  
公劉潔等擊吐京叛胡失利潔被傷勤死之

司馬天助晉驃騎將軍元顯之子歸魏拜青徐二州刺

史太武真君三年從駕北征在陣歿

羅雲獻文時為給事中西征勅勒為賊所襲殺

章武王融弟武為光祿大夫賊帥鮮于修禮寇暴瀛定  
二州長孫稚等討之失利除融車騎將軍為前駟左軍  
都督與廣陽王淵等共討修禮師渡津葛榮殺修禮而  
自立轉營至白牛邏輕騎擊融融苦戰終日更無外援  
遂大奔敗於陣見殺

崔延伯為右衛將軍討万俟醜奴為其所敗復收兵襲

賊大破之賊皆退而兵入採掠散亂不整還來衝突遂大奔敗延伯中流矢為賊所害士卒死者萬餘人

李龍環以勇壯為將孝明正光中北征戰死白道

裴衍為北道大都督與源子邕北討葛榮軍次陽平之東北陽曲賊來拒戰衍軍敗見害朝野人情莫不駭惋崔楷為殷州刺史孝昌三年葛榮陷殷州楷固節死之酈惲為征虜將軍與唐州刺史崔元珍固守平陽武泰中爾朱榮稱兵赴雒惲與珍不從其命為榮行臺郎中

樊子鵠所攻城陷被害崔元珍為唐州刺史爾朱榮之趣雖也遣其都督樊子鵠取唐州元珍與行臺酈惲拒守不從為子鵠所害

裴約為別將行渤海郡事時冀州大乘賊起約為賊所敗遂圍郡城城陷見害

元志為雍州刺史時莫折念生反詔志為西征都督討之念生遣其弟天生屯龍口與志相持為賊所乘遂棄大衆奔還岐州賊遂攻岐州刺史裴芬之疑城人與賊

潛通將盡出之志不聽城人果開門引賊鎖志及芬之  
送念生見害節閔初贈尚書僕射

奚文為散騎常侍從征蠕蠕戰沒

尉豹行潁州事與梁將裴禮戰沒

丘跋為安遠將軍征蓋吳戰沒

高徽孝明時使噉噉迴至河州前刺史息景進等招引莫  
折念生攻河州長史元永平等推徽行州事別駕乞伏世則  
潛通景進徽殺之徵兵于吐谷渾吐谷渾率衆救之景進



敗退走奔秦州尋率羌夷復來攻逼徽遣統軍六景相馳表請師詔徽仍行河州事久無救援力屈城陷為賊所害李喬為使持節大將軍陝州刺史宇文黑獺攻陷州城被執見害

崔伯鳳為前將軍孝莊永安末與都督源子恭守丹父戰沒

崔伯麟為中堅將軍冀州長史大乘賊起伯麟率州軍討之於賁棗城為賊所殺贈龍驤將軍雒州刺史

李苗為冠軍將軍討爾朱世隆於河南橋兵盡浮河而  
沒苗死之日朝野悲壯之及世隆入雒主者追苗贈封  
白世隆世隆曰吾爾時羣議更一二日便欲大縱兵士  
焚燒都邑任其採掠賴苗京師獲全天下之善一也宜  
追之

薛長瑜為征東將軍雒州刺史擊賊沒于陣贈都督冀  
定秦三州諸軍事車騎將軍冀州刺史

寇治為前將軍時蠻反於三鴉治為都督追討戰沒贈

持節都督雍華岐三州諸軍事

鄭模為征東將軍行岐州事未幾擊賊深入沒於陣贈  
撫軍將軍相州刺史

裴仲規以司徒主簿免久之中山王英征義陽引為統  
軍奏復本職規陣戰歿贈河東太守謚曰貞

孫瓚為姚泓安定護軍時赫連屈子來侵人懷危懼亡  
奔者相屬瓚獨率眾拒守見殺

李長壽為華州刺史孝武西遷長壽率勵義士拒東魏

孝武嘉之復授潁州郡守遷廣州刺史東魏遣行臺侯景率兵攻之長壽衆少城陷遂遇害

崔仲哲為別將初父康為燕州刺史時天下多事遂為杜維周攻圍康堅守歷年朝廷遣都督元譚與仲哲赴救到下口遇賊仲哲戰沒

北齊尉興敬為神武帳內都督高祖敗周文帝於邙山興敬因戰為流矢所中卒贈涇岐幽三州軍事

尉興慶為神武親信都督帝與西魏戰退走從者六七

人追騎至興慶曰王去矣興慶腰邊百箭足殺百人神武勉之曰事濟以爾為懷州若死則用爾子興慶曰兒小願用兄許之興慶鬪矢盡而死

高昂為軍司大都督與侯景等同攻獨孤如願于金墉城周文帝率衆救之戰於邙陰昂所部失利左右分散單騎東出欲趨河陽南城門閉不得入遂為西軍所害劉豐自左將軍除殷州時西魏大將王思政據長社文襄命豐與清河王岳攻之豐建水攻之策遂遏洧水以

灌之水長魚鱉皆遊焉九月至四月城將陷豐與行臺  
慕容紹宗見北有白氣同入船忽有暴風從東北來正  
晝昏暗飛沙走礫船纜忽絕漂至城下豐泅水向土山  
為浪所激不得至西人鈎之並為敵人所害豐壯勇善  
戰諸將所推死之日朝野駭惋

王琳為特進侍中時陳將吳明徹來寇秦州琳與戰大  
敗單馬突圍僅而獲免明徹進圍之堰淝水灌城而皮  
景和等屯於淮西竟不赴救明徹晝夜攻擊城內水氣

轉侵人皆患腫死病相枕從七月至十月城陷被執百姓泣而從之明徹恐其為變遂殺之

慕容紹宗為河南道行臺拒西魏大將王思政船為西人所鈎投水而死三軍將士莫不悲惋

元景安天統中為領軍大將軍入周以大將軍義寧郡開國公率衆討稽胡戰沒

後周王勵為千牛直長沙苑之役勵以都督領兵從太祖勵居左翼與帳下十數人用短兵接戰當其前者死

傷甚衆勵以被傷重遂卒于行間太祖深悼焉

楊榘為少師武帝保定四年十月詔晉公護率軍伐齊  
出潼關大將軍權景宣出豫州擄出枳關蜀國公尉遲迥  
率師圍雒陽景宣攻齊豫州護次陝州十二月齊師渡  
河晨至雒陽諸軍驚散尉遲迥率麾下數十騎扞敵得  
却至夜引還柱國庸國公王雄力戰死之遂班師楊榘  
於軹關戰敗權景宣亦棄豫州而還

常祐字法保為驃騎大將軍東魏遣軍送糧饋宜陽法



保潛邀之轉戰數十里兵少不敵為流矢所中卒於陣  
韋總從武帝東征總每率麾下先驅陷敵遂於并州戰  
沒

王雄從晉公護東征至却山與齊將斛律明月接戰雄  
馳殺三人明月退走雄追之明月左右皆散矢又盡唯  
餘一奴一矢雄案稍不及明月者大餘曰惜爾不殺但  
生將爾見天子明月反射雄中額焉退走至營而薨

劉雄為上大將軍出鎮幽州宣政元年四月突厥寇幽

州擁略居民雄出戰為突厥所圍臨陣戰沒贈亳州總管十州諸軍事亳州刺史

楊祥為建武將軍討鮮于修禮遂死之

隋權武父襲慶為周開府從武元皇帝戰於并州被圍百餘重襲慶力戰矢盡短兵接戰殺傷甚衆於是刀稍皆折脫胄擲地向賊大罵曰何不來斫頭賊遂殺之

柳雄亮父檜為周華陽太守遇黃寶作亂攻陷華陽檜為賊所害

皮子信為旭州刺史開皇初吐谷渾來寇邊子信出兵拒戰為賊所敗子信死之

趙世模為上開府開皇初嘗典宿衛後從晉王伐陳先鋒遇賊力戰而死

韋洸開皇中為廣州總管歲餘番禺夷王仲宣聚眾為亂以兵圍洸洸勒兵拒之中流矢而卒贈上柱國

劉弘開皇中為泉州刺史會高智慧作亂以兵攻州弘城守百餘日救兵不至前後出戰死亡大半糧盡無

食與士卒數百人煮犀甲腰帶及剥樹皮而食一無離  
叛賊知其饑餓欲降之弘抗節彌厲賊悉衆來攻城陷  
為所害

楊武通為左武衛將軍歷岷簡二州總管與周法尚討  
嘉州叛獠法尚軍初不利武通率數千人為賊斷其歸  
路武通於是束馬懸車出賊不意頻戰破之賊知其孤  
軍無援傾部落而至武通轉鬬數百里為賊所拒四面  
路絕武通輕騎接戰墜馬為賊所執殺而噉之

李崇為幽州總管開皇中突厥大為寇掠崇率步騎三千拒之轉戰十餘日師人多死遂保於砂城突厥圍之城本荒廢不可守禦曉夕力戰又無所食每夜出掠賊營復得六畜以繼軍糧突厥畏之厚為其備每夜中結陣以待之崇軍苦饑出輒遇敵死亡畧盡遲明奔還城者尚且百許人然多傷重不堪更戰突厥意欲降之遣使謂崇曰若來降者封為特勒崇知必不免命其士卒曰崇喪師徒罪當死今日效命以謝國家待看吾死不可降

賊方便散走努力還鄉若見至尊道崇此意乃挺刃突賊復殺二人賊亂射之卒於陣

楊崇封秦興縣公從行軍總管達奚長儒擊突厥於周  
槃力戰而死贈大將軍豫州刺史以子義臣襲崇官爵  
楊思恩為車騎將軍煬帝嗣位漢王諒作亂并州時代  
州總管李景為漢王將喬鍾葵圍之詔朔州總管楊義  
臣救之義臣率馬步二萬夜出西陁遲明行數十里鍾  
葵覘見義臣兵少悉衆拒之鍾葵亞將王拔饒勇善用

稍射者不能中每以數騎陷陣義臣患之募能當拔者  
思恩請當之義臣見思恩氣貌雄勇顧之曰壯士也賜  
以卮酒思恩望見拔立於陣後投觴於地策馬赴之再  
往不剋義臣復選騎士十餘人從之思恩遂突擊殺數  
人直至拔麾下短兵方接所從騎士退思恩為拔所殺  
拔遂乘之義臣軍北者十餘里於是購得思恩屍義臣  
哭之甚慟三軍莫不泣所從騎士皆腰斬

周羅睺為右武侯大將軍漢王諒餘黨據晉絳呂三州

未下詔羅睺行絳晉呂三州諸軍事進兵圍之為流矢  
所中卒於師

張定和為右屯衛大將軍從煬帝征吐谷渾至覆袁川  
時吐谷渾主與數騎而遁其名王詐為渾主保車我真  
山帝命定和率衆擊之既與賊相遇輕其衆少呼之令  
降賊不肯下定和不被甲挺身登山賊伏兵於巖谷之  
下發矢中之而斃其亞將柳武達擊賊悉斬之帝為流  
涕



梁默為柱國行軍總管大業五年從煬帝征吐谷渾遇賊力戰而死

李瓊為右翊衛將軍大業五年吐谷渾主率眾保覆袁川帝遣左光祿大夫梁默與瓊追渾主皆遇賊死之

馮孝慈為右武候衛將軍大業九年清河賊張金稱眾數萬孝慈討金稱於清河反為所敗孝慈死之

楊達煬帝遼東之役領右武衛將軍進位左光祿大夫卒於師煬帝歎息久之贈吏部尚書始安侯謚曰恭贈

物三百五十段

麥鐵杖為右屯衛大將軍煬帝待之逾密鐵杖自以荷  
恩深重每懷竭命之志及遼東之役請為前鋒顧謂醫  
者吳景賢曰大丈夫性命自有所在豈能艾炷灸頰爪  
帶散鼻療黃不差而卧死兒女手中乎將渡遼謂其三  
子曰阿奴當備淺色黃衫吾荷國恩今是死日我既被  
殺爾當富貴唯誠與孝爾其勉之及濟橋未成去東岸  
尚數丈賊大至鐵杖跳上岸與賊戰死武賁即將錢士

雄孟金叉亦死之左右更無及者帝為之流涕

梁文謙大業中為鷹揚將軍從衛玄擊楊玄感於東都力戰而死贈通議大夫

張須陁大業中為齊郡通守領河南道十二郡黜陟討捕大使將兵拒東郡賊翟讓前後三十餘戰每破走之轉滎陽通守時李密說讓取雒口倉讓憚須陁不敢進密勸之讓遂與密率兵逼滎陽須陁拒之讓懼而退須陁乘之逐北十餘里時李密先伏數千人於林間邀擊

須陁軍遂敗績密與讓合軍圍之須陁潰圍輒出左右不能盡出復躍馬入救之往來數四衆敗散乃仰天曰兵敗如此何面見天子乎乃下馬戰死

郭絢大業末為涿郡通守將兵擊竇建德於河間戰死人吏哭之數月不息

源崇嗣大業中自上黨贊治入為尚書虞部郎及天下盜起將兵討北海賊與賊力戰而死贈正議大夫

王辯為武賁郎將與王世充討李密於雒口官軍大潰

辯至雒水橋已壞不得渡遂涉水至中流為溺人所引  
墜馬辯時身被重甲敗兵前後相蹈藉不能復上馬竟  
溺死三軍莫不痛惜之

陰世師大業末為左翊衛將軍與代王留守京師及唐  
公義軍至世師自以世荷隋恩又藩邸之舊遂勒兵拒  
守月餘城陷與京兆郡丞骨議等見誅

孟善誼為河內通守恭帝義興二年王世充為李密所  
敗善誼與武賁郎將王辯楊威劉長恭梁德董知通皆

死之

唐孫華馮翊人義師起歸於高祖與劉弘基等破隋將  
桑顯和於餘馬泉拜為馮翊太守封武鄉公從圍京師  
為流矢所中卒

劉感武德初以驃騎將軍鎮涇州薛仁果率衆圍之感  
嬰城拒守城中糧盡遂殺所乘之馬以分將士感一無  
所噉唯煮馬骨取汁和木屑食之城垂陷者數矣長平  
王叔良援兵至仁果解圍而去感與良出戰為賊所擒

仁杲復圍涇州令感語城中云援軍已敗徒守孤城何益也宜早出降以全家室感許之及至城下大呼曰逆賊饑餓亡在朝夕秦王率數十萬衆四面俱集城中勿憂各自勉以全忠節仁杲大怒執感於城邊馳騎射殺之至死聲色逾厲賊平高祖購得其屍祭以少牢

羅士信為絳州總管封郟國公從太宗繫黑闥於河北有洺水人以城來降遣士信入城據守賊悉衆攻之甚急遇雨雪大軍不得救經數日城陷為賊所擒黑闥聞其

勇意欲活之士信辭色不屈遂遇害

呂子臧武德初為鄧州刺史與馬元規擊山南賊帥朱  
粲遇霖雨城壞賊攻之急所親者知城必陷或勸其降  
子臧曰安有天子刺史降賊者乎於是率左右數百人  
赴敵而死俄而城陷元規亦遇害

李育德為陟州刺史其兄厚德時陷王世充逃歸渡河  
為寇所執世充囚之於獲嘉使其作書召育德育德陽  
許之故其兄繫獄久不死世充殷州刺史段大師遣小



師趙君穎以兵守之厚德陰結於君穎及城中人賈慈行謀翻獲嘉以背世充慈行與子弟奴客十餘人大呼於上云李家兵悉登城矣君穎於獄中以馬載厚德擁獄囚及援兵數十人叫譟而出至衙門門外逢偽長史趙景休斬之以徇衆皆懾伏至廳前後者數百大師踰城而遁遂尅殷州拜厚德為刺史厚德歸省親疾遣育德居守世充怒悉衆擊之數日城陷育德力戰於中門之外及弟三人皆死之

趙景慈為華州刺史領行軍總管擊堯君素於蒲州被  
創墮馬為賊所執君素囚之十餘日景慈憤恚飲寒水  
數升受風而死君素斬之梟首於城外贈秦州刺史謚  
曰忠

何潘仁右屯衛將軍武德二年討山賊張子惠於絲竹  
園輕敵遇害

梁禮為鄜州刺史封鄜城郡公武德二年梁師都侵延  
州禮力戰沒於陣

曹四郎為鄧州總管武德三年九月王世充陷鄧州四郎因戰死之

張孝珉為驃騎將軍驍勇善戰初為王世充將軍後以衆歸國高祖令督本兵經畧世充武德三年六月為世充所圍衆寡不敵力屈就擒見世充辭色不撓遂為所殺

盧君諤為行軍總管武德四年隨齊王元吉擊王世充世充騎將楊公信犯官軍元吉擊之反為所敗君諤死

之

權威為魏州刺史武德四年八月劉黑闥陷鄒縣威與  
貝州刺史戴元祥討之反為所敗威及元祥皆死之

長平王叔良高祖從父弟鎮涇州武德四年胡賊入寇  
召叔良等五將帥師北伐為流矢所中師旋道薨

盧士叡為瀛州刺史武德四年劉黑闥陷瀛州士叡死  
之先是黑闥之亂士叡勒兵拒守黑闥遣輕騎襲之破  
其羅城士叡據子城拒戰經半日士卒並河間人見羅

郭已陷親屬為虜莫有鬪志皆踰城而出士叡為賊所擒遣人執之出說諸城堡士叡不從為賊所殺

李大恩為代州總管上表言馬邑可圖高祖令內殿少監獨孤晟率兵與其合勢大恩率所部直趨馬邑晟軍不至大恩頓於新城突厥與劉黑闥合圍之高祖聞之遽令將軍李高遷為援未至大恩糧盡夜遁為賊所邀軍遂大潰大恩為虜所敗死之高祖聞之傷惜久之

張德政為鄆州都督武德八年八月及并州道行軍總

管督兵張公瑾與虜戰於大谷我師敗績德政死之

姜確為左屯衛將軍貞觀十九年從太宗征遼東以行軍總管督兵攻蓋牟城中流矢而卒

王君諤為左武衛將軍從太宗征遼東兼領左屯營兵與高麗戰於駐驛山君諤先鋒陷陣遂與賊短兵相接賊以鉞斧擊之墜馬左右不繼以至於難還卒於營太宗深痛惜之左右坐誅者數人子及善嗣拜朝散大夫謝萬歲為梓州都督高宗永徽元年與兗州刺史謝法

興黔州都督李孟嘗討琰州獠賊萬歲法興入洞招慰  
為賊所殺

來濟顯慶中為中書令左遷台州二年徙庭州刺史俄  
有突厥入寇濟總兵拒之謂其衆曰吾嘗挂刑網蒙赦  
性命當以身塞責特報國恩不擇甲冑赴賊沒於陣

蘇孝祥為右監門衛將軍則天文明元年徐敬業據揚  
州與其將李導會於高郵之下阿谿列營拒守孝祥為  
後軍總管率兵五千人夜用小船先渡水擊之反為所

敗孝祥臨陣見殺兵士溺死者過半

許欽明為涼州都督萬歲通天元年九月吐蕃寇涼州  
欽明嘗出按行有吐蕃數萬奄至城下欽明拒戰久之  
力屈被執賊將欽明至靈州城下欽明大呼曰賊中都  
無飲食城中有美醬乞二升梁米乞二斗墨乞一挺是  
時賊營處四面阻涅河唯有一路得入欽明詐乞此物  
以喻城中冀其揀兵練將候夜掩襲城中無悟其旨尋  
遇害



王孝傑為清邊道行軍總管萬歲通天二年孝傑與蘇宏暉等率兵十七萬與孫萬榮戰於東硤石谷官軍敗績盡陷於賊孝傑死之

牛師獎為安西都護軍中宗景龍二年十一月與娑葛戰于火燒城師獎敗績沒於陣

王海賓為太子右衛率豐安軍使以驍勇聞玄宗開元二年七月吐蕃入寇朝廷以薛訥攝左羽林將軍為隴右防禦使禦之以海賓為先鋒及賊至渭川西界武階

驛苦戰勝之殺獲甚衆諸將嫉其功按兵不救海賓沒  
於陣大軍乘其勢擊而敗之斬首一萬七千級獲馬七  
萬五千匹牛羊十四萬頭帝聞而憐之詔贈左金吾大  
將軍

郭英傑為幽州道副總管開元二十一年討契丹於都  
山為賊所敗英傑死之

褚誨為隴右副將時皇甫惟明為隴右節度使天寶四  
年奚及契丹酋長各殺公主舉部落以叛惟明與吐蕃

戰於石堡官軍不利討死之

王伯倫為御史大夫崔光遠行軍司馬肅宗正德二年  
八月光遠於駱谷破賊千餘人賊寇鳳翔伯倫與光遠  
判官李椿領兵二千人自中渭橋攻殺守橋賊一千人  
伯倫等乘勝至苑門賊先有本軍屯武功聞官軍入苑  
燒營幕而退走伯倫遇賊於苑伯倫死於陣前李椿為  
賊所得

李元忠為涇原兩州團練兵馬使上元元年死王事

呂希倩為左龍武大將軍德宗建中四年十月德宗避難於奉天朱泚賊將於城東西南三面偷城渾瑊率招召突將三百人分道連戰翌日辰時殺傷太甚力屈而退希倩死之贈太尉賜實封三百戶

高重傑為將軍奉天之難泚賊攻城重傑力戰而死贈司空實封三百戶

鄺定進為左神策軍大將軍封陽山郡王定進時號為勇將嘗征蜀有功憲宗元和五年討王承宗力戰陣敗

馳歸馬倒賊識曰酈王也遂為所害官軍為之喪氣繇是贈兵部尚書賻布帛米有差

田布弘正子也元和十五年弘正移鎮以布為河陽節度長慶元年春移鎮涇原其秋鎮州軍亂弘正被殺朝廷以李愬疾不能軍無以扞廷湊之亂且以魏州田氏舊衆乃疾徵布使起復為之節度仍遷檢校工部尚書詔布乘急傳之鎮布喪服居堊室去節旄導從之飾及入魏州居喪御事動皆得禮其祿俸月入百萬一無所

取又籍魏中家之舊產無巨細計錢十餘萬貫皆出之以頒軍士乃選其將史憲誠為先鋒兵馬使以憲誠前出已麾下必能輸竭故盡以精銳付焉是時屢有中使齎急詔促其進兵至十月布遂以全軍三萬七千出討賊抵冀州南宮縣十二月進軍下賊二柵而魏人怯於格戰且以寒雪餽餉不給寢無鬪志憲誠因從而間之俄有詔分布軍與李光顏合勢東救深州其衆因大潰多為憲誠所有布提兵八千以是月十日還魏州十一

日會諸將復議興師而將卒益驕情皆曰尚書能行河朔舊事則死生行之若使戰皆不能也布自度其衆終不為用歎曰功無成矣即日密表陳軍情且稱遺表曰臣觀衆意終負國恩臣既無功敢忘即死伏願陛下速救光顏元翼不然者義士忠臣皆為河朔屠害奉表號哭授其從事李石乃入啓父靈抽刃刺心曰上以謝君父下以示三軍言訖而絕時議以布才雖不足能以死謝國家心志決烈得燕趙之古風

梁翟存初為太祖諸軍都指揮使唐昭宗大順二年正月令丁會下黎陽龐師古與存西路下淇門衛縣自是常為先鋒雄猛善戰士皆仗之為氣大破朱瑾衆於墉下督戰晝夜不懈勒戰卒閱礮倚立修竿忽為飛矢所中卒太祖深傷惜之

朱友寧太祖仲兄之子也領嶺南西道節度使天復三年四月率師破青州之博昌臨淄二邑殺戮五千餘衆暨北海馬六月丙子友寧復進逼青州及石樓與賊相



遇決戰我師未振友寧馳騎督軍薨於陣

牛裕為桐墟鎮使乾元二年淮人寇桐墟殺畧吏民裕死之

郭言為宿州刺史於時徐宿兵鋒日夕相接控扼偵邏以言為首景福初時溥大舉來攻宿州言勇於野戰喜逢大敵自引銳兵擊溥殺傷甚衆徐戎立退為流矢所中一夕而卒

王彥章為滑州節度使晉師陷鄆州代戴思遠為北面

招討使彥章渡汶以畧鄆境至遞坊鎮為晉人所襲彥章退保中都兵敗為晉將夏魯哥所擒晉王素聞其勇悍欲全活之令中使慰撫以誘其意彥章曰我是匹夫本朝擢居方面與皇帝十五年抗衡今日兵敗力窮死有常分皇帝縱垂矜宥何面目見人豈有為臣為將朝事梁而暮事晉乎得死為幸遂遇害

符道昭為秦州節度使與康懷英等攻潞州以蚰蜒塹繚之飛鳥不度既踰歲晉人援至王師大敗道昭為晉

軍所殺

後唐朱元禮始為郡將梁太祖聞其名擢為軍校從龐師古渡淮戰沒於淮南

安福遷與其兄福慶俱驍勇為武皇親校景福末汴人急攻兗鄆朱瑄求援於武皇乃令福順等三將率騎軍以赴之福順與汴人戰沒福慶從史儼奔淮南朱瑄之敗福遷亦遇害

周德威為幽州節度使天祐十五年下揚劉城莊宗大

閱諸軍渡河趨汴徵德威進討師之將起威以為不利  
深入是夜鎮星犯文昌上將臨戰德威軍為輜重所擾  
大亂梁軍乘之父子躍馬出血戰而死

史建瑋為相州刺史張文禮叛總北面行營兵馬攻趙  
州進攻鎮州營於西南隅日以輕騎逼門為伏弩所中  
歸營而卒

李嗣昭權幽州軍府事會閭竇為鎮州張處瑾所敗莊  
宗以嗣昭代之嗣昭為流矢所中尋卒於師

孫重進為大將性嚴重立法士卒畏憚天祐末張文禮據鎮州重進攻之戰沒於東垣渡

李存進為魏博馬步都將會王師討張文禮於鎮州招討李嗣昭不利而歿以存進代之遂討鎮州王處瑾盡率其衆棄其無備奄至壘門存進聞之得部下數人出闔驅賊於橋下俄而賊大至後軍不繼血戰而死

夏魯奇明宗時為遂州節度使劉訓討荆南魯奇為副招討使移鎮遂州時孟知祥董璋據有兩川魯奇僻居

南鄙董璋之叛與知祥攻遂州旬日援路斷絕兵盡食  
乏勢知必屈乃自刎而卒

安審通為橫海軍節度觀察等使兼北面行營諸道馬  
軍都指揮使圍中山躬冒矢石以先士卒志平氛祲為  
飛矢所中卒

朱建豐為趙州刺史王師討定州為北面行營右廂步  
軍都指揮使張延朗以偏師先圍新樂卒於王事詔贈  
太傅

晉郭璘為易州刺史契丹攻其郡璘率勵士衆同其甘苦虜不能克復以州兵擊賊數獲其利朝廷嘉之就加檢校太保虜主嘗謂左右吾不畏一天下乃為北人所抑挫會杜重威降虜使通事耿崇美誘其民衆璘不能制為崇美所殺

宋廷浩為房州刺史汜水關巡檢使天福二年為賊軍所害

梁漢璋為永清軍節度使天福八年詔領千騎戍冀州

尋以杜重威北討詔以漢璋充北面軍馬都排陣使戍游口關與虜騎五千相遇於浮陽之北界苦戰竟日以衆寡不侔為流矢所中沒於陣

王清為奉國都虞候谿州刺史少帝開運二年從杜重威北征解陽城之圍清苦戰為步校之最加檢校司空及從杜重威收瀛州聞契丹大至重威率諸軍沿澆水而將保常山及至中渡橋虜已屯於北岸且扼歸路清知勢蹙請於重威曰軍去常山五里守株於此營孤食



盡將若之何請以步軍二千為其前鋒奪橋開路公可  
率諸軍繼之期入常山必矣重威可之遣宋彥筠俱行  
清一擊獲其橋虜為之小却重威猶豫不進密已貳於  
國矣彥筠尋退走清列陣北岸嚴戒部曲日暮酣戰不  
息虜以生軍繼至我無寸刃益之清與其下俱沒焉  
吳巒為復州防禦使開運中權知貝州虜復南牧擾我  
河塞巒以城無戍兵為虜所陷遂死之

沈斌為祁州刺史趙延壽知其無備與蕃賊急攻之仍

呼謂斌曰沈使君我故人也擇禍莫若輕早以城降無  
自辱也斌登城呼曰侍中父子誤計陷於腥膻忍以大  
羊之衆殘害父母之邦不自羞慙反有德色沈斌寧為  
國家死必不效所為也翌日城陷而卒

漢史萬山為深州刺史乾祐三年春虜大入寇萬山城  
守有功虜退周太祖遣索方進率騎七百屯深州一日  
虜數十騎侵周東門萬山父子以虜不多乃率牙兵百  
餘人襲虜虜偽退十餘里而兵發萬山血戰急請救於

方進方進勒兵不出萬山死之

禹洪遷為夏州節度使會趙思綰據永興叛從郭從義進討之戰傷卒於陣

安文祐潞人也初孟方立據邢洺率兵攻上黨朝廷授文祐昭義節度使令討方立自蜀至澤州與方立戰敗沒於陣

李瓊為威州刺史行及鄭遇羣盜攻郡瓊禦賊中流矢而卒

周蕭處仁為右金吾衛將軍世宗率兵渡淮以先鋒兵馬都監攻陷滁州為流矢所中而卒

白延遇為濠州刺史帥衆從侍衛使李重進攻圍濠州力戰為賊所傷數日而卒

冊府元龜卷四百二十五

欽定四庫全書

冊府元龜卷四百二十六 宋 王欽若等撰

將帥部

招降

夫舞干之義載於虞書前禽之訓昭回義易自大道之  
喪佳兵是用勝者類封豕之荐食敗者同困獸之猶聞  
是以肝腦塗地城郭為墟斯豈明王來蘇之意先賢節  
奏之舉乎其有授鉞於廟建牙作藩董茲戎服共行天

罰乃能宣布德澤招來携貳結之以恩信格之以誠明  
先聲以奪其心大義以回其志使其奔走而獻款俯伏  
而求全斯亦善師不陣之謂矣至或孤壘危急士衆離  
析閔以窮困釋其怨疾俾夫洗滌以更始感激而效忠  
雖云仁者之志抑亦兵家之奇焉

漢項羽為楚懷王上將軍救趙秦將章邯軍棘原羽軍  
漳南相持未戰秦軍數却二世使人讓章邯邯恐使長  
史欣請事至咸陽留司馬門三日趙高不見欣恐還走

至軍門曰事亡可為者

言不可復為  
軍旅之事

陳餘亦遺章邯書

曰將軍何不還兵與諸侯為從

言欲如六國  
時共敵秦

南面稱孤

孰與身伏斧質妻子為戮乎章邯狐疑陰使候始成使

羽欲約

軍候姓  
始名成

約未成羽使蒲將軍軍漳南與秦戰

再破之羽悉引軍擊秦軍汙水上大破之邯使使見羽

欲約羽召軍吏謀曰糧少欲聽其約軍吏曰善羽乃與盟

洹水南殷墟上已盟邯見羽流涕為言趙高

魏豹傳云  
項羽破秦

軍降  
章邯

韓信擊破趙軍用廣武君李左車策發使燕燕從風而靡

後漢趙憙字伯陽南陽宛平人也更始即位武陰大姓李氏擁城不下更始遣柱天將軍李寶降之不肯云聞宛之趙氏有孤孫憙信義著名願得降之更始乃徵憙憙年未二十旣引見更始笑曰繭栗犢豈能負重致遠乎卽除為郎中行偏將軍事使詣舞陰而李氏遂降憙因進入潁川擊諸不下者歷汝南界還宛更始大悅謂



憲曰卿名家駒努力勉之

武帝謂劉德為千里之駒故以憲比之

以戰勞

拜中郎將封勇功侯時江南未賓道路不通以憲守簡陽侯相憲不肯受兵單車馳之簡陽吏民不欲內憲憲乃告譬呼城中大小示以國家威信其帥卽開門面縛自歸繇是諸營壁悉降荊州牧奏憲才任理劇詔以為平林侯相攻擊羣賊安集已降者縣邑平定

吳漢為大司馬既擊破五校賊時鬲縣五姓共逐守長據城而反諸將爭欲攻之漢不聽曰使鬲反者皆守長

罪也敢輕冒進兵者斬乃移檄告郡使收守長而使人  
謝城中五姓皆喜卽相率降諸將乃服曰不戰而下城  
非衆所及也又更始尚書令謝躬留魏郡太守陳康守  
鄴大率諸將擊菜賊世祖因躬在外乃使漢襲其城漢  
先令辨士說陳康曰蓋聞上智不處危以僥倖中智能  
因危以為功下愚安於危以自亡危亡之至在人所繇  
不可不察今東師敗亂四方雲擾公所聞也蕭王兵強  
士附河北歸命公所見也謝躬內背蕭王外失衆心公

所見也公今據孤危之城待滅亡之禍義無所立節無所成不若閉門內軍轉禍為福免下愚之敗收中智之功此計之上者也康然之於是收劉慶及躬妻子開門內漢等

馮異為孟津將軍統魏郡河內二郡軍河上與河內太守寇恂合勢以拒更始將朱鮪等異乃遺李軼書曰愚聞明鏡所以照形往事所以知今昔微子去殷而入周項伯畔楚而歸漢周勃迎代王而黜少帝霍光尊孝宣

而廢昌邑彼皆畏天知命覩存亡之符見廢興之事故  
能成功於一時垂業於萬世也苟令長安尚可扶助延  
期歲月疏不間親遠不踰近李文豈能居一隅哉今長  
安壞亂赤眉臨郊王侯搆難大臣乖離綱紀已絕四方  
分散異姓並起蕭王跋涉霜雪經營河北方今英俊雲  
集百姓風靡雖邠岐慕周不足以踰李文誠能覺悟成  
敗亟定大討論功古人轉禍為福在此時矣如猛將長  
驅嚴兵圍城雖有悔恨亦無及已初軼與光武首結謀

約加相親愛及更始立反陷戮伯升雖知長安已危欲降又不自安乃報異書曰軼本與蕭王首謀造漢結死生之約同勞苦之計今軼守雒陽將軍鎮孟津俱據機軸千載一會思成斷金唯深達蕭王願進愚策以佐國安人軼自通書之後不復與異爭鋒故異因此得北攻天井關拔上黨兩城又南下河南成臯巴東十三縣及諸屯聚皆平之降者十餘萬

岑彭為廷尉行大將軍事與大司馬吳漢等圍雒陽數

月更始將朱鮪堅不下光武以彭嘗為鮪校尉令往說鮪鮪在城上彭在城下相勞苦如平生鮪因曰大司徒被害鮪預其謀

大司徒光武兄伯升為更始所殺

又諫更始無遣蕭王

北伐自知罪深彭還具言於帝帝曰夫建大事者不念小怨鮪今若降官爵可保况誅罰乎彭復告鮪鮪從城上下索曰必信可乘此上彭趣索欲上鮪見其誠即許降後五日鮪將輕騎詣彭乃面縛與彭俱詣河陽帝即解其縛與見之復令彭夜送鮪歸城明旦悉其衆出降彭

後為征南大將軍伐蜀以夾川谷少水險難漕運留威  
虜將軍馮駿軍江州都尉田鴻軍夷陵領軍李玄軍夷  
道自引兵還屯津鄉當荊州要會喻告諸蠻夷降者奏  
封其君長初彭與交趾牧鄧讓厚善與讓書陳國家威  
德又遣偏將軍屈充移檄江南頒行詔命於是讓與江  
夏太守侯登武陵太守王堂長沙相韓福桂陽太守張  
隆零陵太守田翕蒼梧太守杜穆交趾太守錫光等相  
率遣使貢獻悉封為列侯或遣子將兵助彭征伐於是

江南之珍始流通焉又自率減宮劉歆長驅入江關令  
軍中無得虜掠所過百姓皆奉牛酒迎勞彭見耆老為  
言大漢哀憐巴蜀久見虜役故興師遠伐以討有罪為  
人除害讓不受其牛酒百姓大喜悅爭開門降

馬援為隴西太守遣老豪楊封譬說塞外羗皆來和親  
又武都氐人背公孫述來降者援皆上復其侯王君長  
賜印綬光武喜悉從之

來歙為中郎將建武七年帝使歙至沂歙以書招隗囂



大將軍王遵遵乃與家屬東詣京師

王遵隗囂將也後去囂詣京師拜大中大夫封尚義侯  
光武率諸將上隴使遵持節監大司馬吳漢留營於長  
安時囂將牛邯軍瓦亭遵知囂必敗滅而與牛邯舊故  
知其有歸義意以書喻之曰遵與隗王歆盟為漢自經  
歷虎口踐履死地已十數矣于時周雒以西  
周雒謂東都也無  
所統壹故為王策欲東收關中北取上郡進以奉天人  
之用退以懲外夷之亂數年之間冀聖漢復存當挈河

隴奉舊都以歸本朝生民以來臣人之勢未有便於此

時者也而王之將吏羣居冗處之徒

冗處言所識不遠也

人人抵

掌

說文抵掌擊也戰國策云蘇秦與趙王抵掌而談也

欲為不善之計遵與孺卿

日夜所爭害幾及身者豈一事哉前計抑絕後策不從

所以吟嘯扼腕垂涕登車

扼持也史記云天下之士莫不扼腕以言之

幸蒙

封拜得延論議

道為大中大夫在議論之職

每及西州之事未嘗敢

忘孺卿之言今車駕大衆已在道路吳耿驍將雲集四

境而孺卿以奔離之卒拒要扼當軍衝視其形勢何如

哉夫智者覩危思變賢者泥而不滓

在泥塗之中而不滓汚也

是以

功名終申策畫復得故夷吾束縛而相齊

新序曰桓公與管仲鮑叔

賓戚飲桓公謂鮑叔曰姑為寡人祝乎鮑叔奉酒而起祝曰吾君無忘在莒也使管子無忘束縛從魯也使賓戚無忘其飲牛于車下也黔布仗劍以歸漢

黔布為楚淮南王高祖使隨何說布乃仗劍歸

漢王

去愚就義功名并著今孺卿當成敗之際遇嚴兵之

鋒可為怖慄宜斷之心胃參之有識耶得書沉吟十數

日乃謝士衆歸命雒陽拜為大中大夫於是囂大將十

三人屬縣十六衆十餘萬皆降

應奏為武陵太守奉詔誘叛蠻降之

祝良為九真太守與交阯刺史張喬慰誘日南叛蠻降之嶺外乃平

曹宗為燉煌太守時北匈奴與諸國共為邊寇宗患其暴害遣行長史索班將千餘人屯伊吾以招撫之於是車師前王及鄯善王來降

龐參為護羌校尉時燒當羌種號多還斷隴道參以恩信招誘之號多等率眾七千人詣參降

馮緄為度遼將軍詔緄招降叛虜於是右賢王部抑鞬等萬三千口詣緄降

夏方為交趾刺史時南蠻夷攻燒城邑方招誘降之

馮續為隴西太守鮮卑寇邊以續為遼東太守曉諭降

集虜皆彌散又遷車騎將軍討長沙零陵蠻賊軍至長

沙賊悉詣營道乞降

營道今道州縣也

進擊武陵蠻夷斬首四

千餘級受降十餘萬人荊州平定

劉表鎮荊州張濟引兵至荊州賈詡隨之歸表襄陽城

守不受濟因攻之為流矢所中濟從子繡收衆而進表  
自責以為已無賓禮遣使招繡繡遂屯襄陽為表比藩  
劉虞字伯安初為幽州刺史思信流著戎狄附之公孫  
瓚討羌有功進屯屬國與胡相擊五六年丘力居等鈔  
畧青徐幽冀四州被其害瓚不能禦朝議以虞既有德  
義若使鎮撫可不勞衆而定乃以虞為幽州牧虞到遣  
使至胡中告以利害責使送張純首丘力居等聞虞至  
喜各遣譯自歸瓚害虞有功乃陰使人邀殺胡使胡知

其情間行詣虞虞上罷諸屯兵但留瓚將步騎萬人屯右北平純乃棄妻子逃入鮮卑為其客王政所殺送首詣虞封政為列侯以功即拜虞大司馬封襄賁侯

呂布為徐州牧在下邳東海蕭建為琅邪相治莒保城自守不與布通與建書曰天下舉兵本以誅董卓耳布殺卓來詣關東欲求兵西迎大駕光復維京諸將自還相攻莫肯念國布五原人也去徐州五千餘里乃在天西北角今不來共爭天東南之地莒與下邳相去不遠

宜當共通君如自遂以為郡郡作帝縣縣自王也昔樂毅攻齊呼吸下齊七十餘城唯莒卽墨二城不下所以然者中有田單故也布雖非樂毅君亦非田單可取布書與智者詳共議之建得書卽遣主簿齋牋上禮貢良馬五匹

魏鍾繇漢末為尚書僕射時關中諸將馬騰韓遂等各擁強兵相與爭太祖方有事山東以關右為憂乃表繇以侍中守司隸校尉持節都督關中諸軍委之以後事



特使不拘科制至長安移書騰遂等為陳禍福騰遂遣  
子入侍

董昭漢末為河南尹時張楊為其將楊醜所殺楊長史  
薛弘河內太守繆尚城守待袁紹救太祖令昭單身入  
城告諭弘尚等即日舉眾降以昭為冀州牧時袁紹遣  
將領顏良攻東郡又徙昭為魏郡太守從討良良死後  
進圍鄴城袁紹同族春卿為魏郡太守在城中其父元  
長在揚州太祖遣人迎之昭書與春卿曰蓋聞孝者不

背親以要利仁者不忘君以徇私志士不探亂以徼幸  
智者不詭道以自危足下大君昔避內難南游百越非  
疏骨肉樂彼吳會智者深識獨或宜然曹公愍其守志  
清恪離羣寡儔故特遣使江東或迎或送今將至矣就  
令足下處偏平之地依德義之主居有太山之固身為  
喬松之偶以義言之猶宜背彼向此舍民趣父也且邾  
儀父始與隱公盟魯人喜之而不書爵然則王所未命  
爵尊不成春秋之義也况足下今日之所託者乃危亂

之國所受者乃矯誣之命乎苟不逞之與羣而厥父之  
不恤不可以言孝忘祖宗所居之本朝安非正之奸職  
難可以言忠孝忠並替難以言智又足下昔者為曹公  
所禮辟夫戚族人而疎所生內所寓而外王室懷邪祿  
而叛知己遠福祚而近危亡棄明義而收大耻不亦可  
惜耶若能翻然易節奉帝養父委身曹公忠孝不墜榮  
名彰矣宜深留計早決良圖鄴既定以昭為建義大夫  
徐晃為偏將軍太祖圍鄴破邯鄲易陽令韓範偽以城

降而拒守太祖遣晃攻之晃至飛矢城中為陳成敗範  
悔晃輒降之既而言於太祖曰二袁未破諸城未下者  
傾耳而聽今日滅易陽明日皆以死守恐河北無定時  
也願公降易陽以示諸城則莫不望風太祖善之又為  
橫野將軍後征張魯別遣晃討攻犢仇夷諸山氏皆降  
之遷平寇將軍

張遼遷裨將軍太祖遣定魯國諸縣與夏侯淵圍昌豸  
於東海數月糧盡議引軍還遼謂淵曰數日已來每行

諸圍豨輒屬目視遼又其射矢更稀此必豨計猶豫故  
不力戰遼欲挑與語儻可誘也乃使謂豨曰公有命使  
遼傳之豨果下與遼語遼為說太祖神武方以德懷四  
方先附者受大賞豨乃許降遼遂單身上三公山入豨  
家拜其妻豨歡喜隨詣太祖太祖遣豨還責遼曰此非  
大將法也遼謝曰以明公威信著於四海遼奉聖旨豨  
必不敢害故也

吳全琮為安東太守明賞罰招誘降附數年中得萬餘

人

呂蒙為偏將軍領尋陽令魏使廬江謝奇為蘄春典農  
屯皖田鄉數為邊寇蒙使人誘之不從則伺隙襲擊奇  
遂縮退其部伍孫子才宋豪等皆攜負老弱詣蒙降又  
劉備令關羽鎮守專有荆土大帝令蒙西取長沙零桂  
三郡蒙移書二郡望風歸服又關羽討樊蒙浮江襲其  
空虛蜀將軍傅士仁在公安拒守蒙令虞翻說之翻至城  
門謂守者曰吾欲與汝將軍語仁不肯相見乃為書曰

明者防禍於未萌知者圖患於將來知得知失可與為人知存知亡足別吉凶大軍之行斥候不及施烽火不及舉此非天命必有內應將軍不先見時時至又不應之獨守縈帶之城而不降死戰則毀宗滅祀為天下譏笑呂虎威欲到南郡斷絕陸道生路一塞案其地形將軍為在箕舌上耳奔走不得免降則失義竊為將軍不安幸熟思焉仁得書流涕而降翻謂蒙曰此譎兵也當將仁行留兵備城遂將仁至南郡南郡太守糜芳城守

蒙以仁示之遂降

吳錄云初南郡城中失火頗焚燒軍器羽以責芳芳內畏懼吳聞而誘之

芳潛相和及蒙攻之乃以牛酒出降焉

蒙入據城盡得羽及將士家屬皆

撫慰令軍中不得干歷人家有所求取蒙麾下士是汝南人取民家一笠以覆官鎧官鎧雖公蒙猶以為犯軍令不可以鄉里故而廢法遂垂涕斬之於是軍中震慄道不拾遺蒙旦暮使親近存恤耆老問所不足疾病者給醫藥饑寒者賜衣糧羽府藏財寶皆封閉以待大帝至羽還在道路數使人與蒙相聞蒙輒厚遇其使周游



城中家家致問或手書示信羽人還私相參訊咸知家門無恙見待過於平時故羽吏士無聞心會大帝尋至羽自知孤窮乃走麥城西至漳鄉衆皆委羽而降大帝使朱然潘璋斷其徑路即父子俱獲荊州遂平

陸脩為交州刺史安南校尉時交阯九真夷賊攻沒城邑交阯騷動脩入南界喻以恩信務從招納高涼渠帥黃吳等支黨三千餘皆出降引軍而南重宣至誠遺以財幣賊帥百餘人民五萬餘家深幽不羈莫不稽顙交

域清泰就加安南將軍復討蒼梧建陵賊破之前後出兵八千餘人以充軍用

諸葛恪為左輔都尉大帝令恪守節度掌軍糧穀非其好也恪以丹陽山險民多果勁雖前發兵徒得外縣平民而已其餘深遠未能擒盡屢自求乞為官出之三年可得甲士四萬衆議咸以丹陽地勢險阻與吳郡會稽新都鄱陽四郡鄰接周旋數千里山谷萬重其幽邃民人未嘗入城邑對長吏皆仗兵野逸白首於林莽逋亡

宿惡咸共逃竄山出銅鐵自鑄甲兵俗好武習戰高尚  
氣力其升山赴險抵突叢棘若魚之走淵援狃之騰木  
也時觀間隙出為寇盜每致兵征伐尋其窟藏其戰勝  
則蠶至敗則鳥竄自前世以來不能羈也皆以為難恪  
父瑾聞之亦以事終不逮恪盛陳其必捷大帝拜恪撫  
越將軍領丹陽太守授祭戟武騎三百拜畢命恪備威  
儀作鼓吹導引歸家時年三十二恪到府乃移書四郡  
屬城長吏令保其疆界明立部位其從化平民悉令屯

居乃分內諸將羅兵幽阻但繕藩籬不與交鋒候其穀稼將熟輒縱兵芟刈使無遺種舊穀既盡新田不收平民屯居畧無所入於是山民饑窮漸出降首恪乃復勅下曰山民去惡從化皆當撫慰徙出外縣不得嫌疑有所執拘白陽長胡伉得降民周遺遺舊惡民困迫暫出內圖叛逆伉縛送詣府恪以伉違教遂斬以徇以狀表上氏聞伉坐執人被戮知官惟欲出之而已於是老幼相携而出歲期人數皆如本規恪自領萬人餘分給諸將

蜀諸葛亮為丞相錄尚書事建興三年亮南征歸至漢陽縣降人李鴻來詣亮亮見鴻時蔣琬與費詩在坐鴻曰聞過孟達許適見王冲從南來言往者達之去就明公切齒欲誅達妻子賴先主不聽耳達曰諸葛亮見顧有本末終不爾也盡不信冲言委仰明公無復已已亮謂琬詩曰還都常有書與子度相聞詩進曰孟達小子昔事振威不忠後又背叛先主反覆之人何足與書耶亮默然不荅亮欲誘達以為外援竟與達書曰往年南

征歲未及還適與李鴻會於漢陽承知消息慨然永嘆  
以存足下平素之志豈徒空託名榮貴為華離乎嗚呼  
孟子斯實劉封侵陵足下以傷先主待士之義又鴻道  
王冲造作虛語云足下量度吾心不受冲說尋表明之  
言追平生之好依依東望故遣有書達得亮書數相交  
通辭欲叛魏魏遣司馬宣王征之即斬滅達亮以達無  
款誠之心故不救助也

晉祖逖為豫州刺史樊雅據醴郡反逖使桓宣說之雅

與宣置酒結友遣子隨宣詣逖少日雅便自詣逖逖遣雅還撫其衆僉謂前數罵辱逖懼罪不敢降雅閉城自守逖往攻之復遣宣入說雅雅即斬異已者遂出降陶侃為龍驤將軍征杜弢弢將王貢精卒三千出武陵江誘五谿夷以舟師斷官運徑向武昌侃使鄭攀及伏波將軍陶延夜趨巴陵潛師掩其不備大破之斬千餘級降萬餘口貢遁還湘城賊中離阻杜弢遂疑張奕而殺之衆情益懼降者滋多王貢復挑戰侃遙謂之曰杜

弢為益州吏盜用庫錢父死不奔喪卿本佳人何為  
隨之也天下寧有白頭賊乎貢初橫腳馬上侃言訖貢  
歛容下脚辭色甚順侃知其可動復令諭之截髮為信  
貢遂來降而弢敗走進尅長沙獲其將毛寶高寶梁堪  
而還又為廣州刺史先是廣州人迎長沙人王機為刺  
史機復遣使詣王敦乞為交州刺史敦從之會杜弘據  
臨賀因機乞降勸弘取廣州弘遂與溫邵及交州秀才  
劉沉俱謀反侃追擊破之執劉沉又遣部將討機斬之



諸將皆請乘勝擊溫邵侃笑曰吾威名已著何事遣兵  
但以函紙自足耳於是下書諭之邵懼而走追獲於始  
興

王導為都督諸軍事蘇峻之亂路永康術賈寧等皆峻  
心腹聞祖約奔敗懼事不立迭說峻誅大臣峻既不納  
永等慮必敗陰結于導導使參軍袁耽潛說路永使歸  
順

南齊始興王鑑鎮益州劫帥韓武方嘗聚黨千餘人斷

流為暴郡縣不能禁行旅斷絕鑑行至上明武方乃出

降長史虞棕

藏宗切

等咸請殺之鑑曰武方為暴積年所

不能制今降而被殺失信且無以勸善於是啓臺果被  
宥自是巴西蠻夷凶惡皆望風降附

梁蕭景高祖初為寧朔將軍行南兗州事天下未定沔  
北倉楚各據塢壁景示以威信渠帥相率面縛請罪旬  
日境內皆平

衡山侯恭監南徐州事時衡州刺史武會超在州子姪

縱暴州人朱朗聚黨反武帝以恭為刺史時朗已圍始興恭至緩服徇賊示以恩信羣賊伏其勇是夜退三舍以避兵軍吏請追恭曰賊以政苛致叛非有陳吳之心緩之則自潰急之則併力諸君置之明日朗遣使請降恭仗節受之一無所問

後魏江陽王繼為平北將軍鎮攝舊都高車酋帥樹擁部民反叛詔繼都督北討諸軍事自懷朔已東悉稟繼節度繼表高車頑黨不識威憲輕相合集背役逃歸計

其亮戾事合窮極若悉追戮恐遂擾亂請遣使甄別推  
驗誓首斬一人其餘加以慰喻若悔悟從役者即令赴  
軍詔從之於是叛徒往往歸順孝文善之顧謂侍臣曰  
江陽足大任也

源子恭為尚書主客郎中攝南主客事時河州羗却鐵  
忽反殺害長吏詔子恭持節為行臺率諸將討之子恭  
嚴勒州郡及諸軍不得犯民一物輕與賊戰然後示以  
恩威兩旬間悉皆降款朝廷嘉之

韋珍孝文初蠻首桓誕歸欵朝廷思安邊之畧以誕為東荊州刺史令珍為使與誕招慰諸蠻珍自懸瓠西入三百餘里至桐栢山窮臨淮源宣揚恩澤莫不降附乃遵為龍驤將軍雒州刺史遵招誘有方梁新化太守杜性新化令杜龍振平陽令杜臺定等率戶三千據地內附

竇瑾為殿中都官尚書從征蓋吳先駢慰喻自平巴西氐羗酋領降下數千家

慕容白曜為右僕射都督諸軍事征南大將軍攻宋斗城宋將房崇吉夜遁獲崇吉母妻待之以禮崇吉與從弟法壽盜宋槃陽城以贖母妻白曜自瑕丘遣將軍長孫觀等率騎入自馬耳關赴之觀至槃陽諸郡悉降又宋幽州刺史劉休賓鎮梁鄒及白曜軍至斗城遣人說之令降休賓不從宋龍驤將軍崔靈延行渤海郡房靈建等數十家皆入梁鄒同舉休賓為征虜守兖州會宋遣使授休賓輔國將軍兖州刺史休賓妻崔邪利女也

生一男字文畢崔氏先歸寧在魯郡邪利之降也文畢  
母子遂與俱入國至是白曜表請崔與文畢既至白曜  
以報休賓又於北海執其弟劉延和妻子送至梁鄒巡  
視城下休賓荅白曜許歷城降當歸順密遣主簿尹  
文達向歷城觀魏國形勢文達詣白曜詐言聞王臨境  
故來祇候私謂白曜曰劉休賓父子兄弟累郡連州今  
若識運知機束手歸化不審明王如何賞叙白曜曰休  
賓仕南爵寵如此今若不勞兵甲望風自降者非直處

卿富貴兼還其婦兒休賓縱令不畏攻圍豈不憐其妻  
子也今在斗城卿自往見文達乃至斗城見休賓妻子文睦  
攀援文達哭泣號咷以爪髮為信文達回還復經白曜  
誓約而去白曜曰卿是休賓耳目腹心親見其妻子又  
知我衆旅少多善其識量自求多福文達還見休賓出  
其妻兒爪髮兼宣白曜所言及國軍形勢謂休賓曰斗  
城已敗歷城非朝則夕公可早圖之休賓撫爪髮泣涕  
曰妻子幽隔誰不愍乎吾荷南朝厚恩受寄邊任今顧



妻子而降於臣節足乎然而密與其兄子聞慰議為降  
計聞慰曰此故當文達誑計耳年常抄掠豈有多軍也  
但可撫強兵勒肅衛方城狹嶮何為便生憂怯示人以  
弱也休賓又謂文達曰卿勿憚危苦更為吾作一返音番善  
觀形勢於是遣文達偷道而出令與白曜為期尅日許  
送降文白曜嘆曰非直休賓父子荷榮城內賢豪亦隨  
人補授卿便即為梁鄒城主以酒灌地啓告山河曰若  
負休賓使我三軍沒覆初白曜之表取休賓妻子也獻

文以道固既叛詔授休賓持節平南將軍冀州刺史平原公至是付文達詔策文達還謂休賓曰白曜信誓如此公可早為決計恐攻逼之後降悔無繇休賓於是告兄子聞慰曰事勢可知汝早作降書聞慰沉疑固執不作遂差本契白曜尋遣著作佐郎許赤虎夜至梁鄒南門下告城上人曰汝語劉休賓既遣文達頻遣僕射許送降文歸誠大化何得違期不來於是門人唱告城內悉知遂相維持欲降不得皆云劉休賓父子欲以我城內人易榮

位也尋被攻逼經冬至春歷城降白曜遣崔道固子景業與文畢至城下休賓知道固降乃出請命白曜送休賓及宿有名望者十餘人俱入代邸為客

尉元為鎮南大將軍援徐州宋東徐州刺史張謐據圍城徐州刺史王玄載守下邳兗州刺史王整蘭陵太守桓欣驅掠近民保險自固元遣慰喻張謐及青州刺史沈文秀等皆遣使通誠王整桓欣相與歸命

呂羅漢為羽林中郎上邽休官呂豐屠各王飛龍等八

千餘家據險為逆詔羅漢與司馬楚之駕前招慰降者  
九千餘戶比至盱眙頻破賊軍擒其將顧儼李觀之等  
以功遷羽林牧郎幢將加建威將軍

楊椿孝文時為寧朔將軍梁州刺史初武興王楊集始為  
楊靈珍所破降於齊至是率賊萬餘自漢中而北規復  
舊土椿領步騎五千出頓下辯貽書集始開以利害集  
始執書對使者曰楊使君此書除我心腹之疾遂領其  
部曲千餘人來降後孝昌中爾朱榮既據并肆與汾州

胡逆表加椿征虜將軍都督慰勞汾胡汾胡與椿比州服其聲望所在降下

盧朶為鎮東將軍徐州刺史宣武永平四年夏朶表曰梁琅瑯郡民王萬壽等歛城內結潛來詣臣云朶山戌今將交換有可圖之機臣即許以旌賞遣其還入至三月二十四夜萬壽等獎率同盟攻掩朶城斬梁輔國將軍琅瑯東莞二郡太守帶朶山戌主劉昕并將士四十餘人傳首至州臣即遣兼郟城戍副張天惠率驍勇二百

徑往赴之琅琊諸戍駱驛繼援而梁郁州已遣二將軍以拒天惠天惠與萬壽等內外齊擊俘斬數百便即據城詔景曰彭宋地接邊疆勢連淮海威禦之術功在不易胸山險塞寇之要防水陸交湊揚郁路衝畜聚凶徒虔留邊鄙青光齊充每離其患卿妙算既敷克城殄衆展疆辟土何善如之庸勲之懋朕用嘉止故遣左右直長閭遵業具宣往懷

北齊薛脩義為安北將軍蜀賊陳雙熾等聚汾曲詔脩

義為大都督與行臺長孫稚共討之脩義以雙熾是其鄉人遂輕詣壘下曉以利害熾等還降拜脩義龍門鎮將脩義又為關右行臺自龍門濟河西魏北華州刺史薛崇禮屯楊氏壁脩義以書招之崇禮率萬餘人降復拜晉州刺史在州擒西魏正北平太守段榮顯招降胡酋胡垂黎等部落數千人表置五原郡以安處之

趙彥深為安國縣伯從文襄征潁川時引水灌城城雉將沒西魏將王思政猶欲死戰文襄令彥深單身入城

告喻即日降之便手牽思政上城

文襄謂彥深曰吾昨夜夢遇一群豕吾射

盡獲之獨一大豕不可得卿言當為吾取須臾獲豕而進至是文襄笑曰夢驗矣即解思政佩刀與彥深曰使

卿當獲

此利

後周于謹初仕後魏為元纂鎧曹參軍事北討茹茹為賊所圍乃奔入塞時魏末喪亂羣盜蜂起謹兼解諸國語乃單身入賊中示以恩信於是西部鐵勒酋長七列河等三萬餘戶並款附魏帝嘉之除積射將軍

權景宣為驃騎大將軍安州刺史燕公于謹征江陵景



宣別破梁司空陸法和司馬羊亮於涓水又遣別帥攻拔  
魯山多造舟艦益張旗幟臨江欲度以懼梁人梁將王琳  
在湘州景宣遺之書諭以禍福琳遂遣長史席整因景  
宣請舉城款附

史寧為征東將軍賀拔勝為荊州刺史寧以本官為勝  
軍司率步騎一千隨勝之部值荆蠻騷動三鴉路絕寧  
先駢平之因撫慰蠻戶翕然降附隨稅得馬一千五百  
匹供軍

王悅為大行臺尚書從達奚武征梁漢軍出武令悅說其城主楊賢悅乃遺之書賢於是遂降又白武云白馬衝要是必爭之地今城守寡弱易可圖也若蜀兵更至攻之實難武然之即令悅輕騎徑趨白馬悅示以禍福其將梁深遂以城降

梁禦為鎮西將軍太祖既平秦隴方欲引兵東下雍州刺史賈顯持兩端通使於齊太祖以禦為大都督雍州刺史領前軍先行既與顯相見因說之曰魏室陵遲天

下鼎沸高歡志在兇逆島夷非遠宇文夏州英姿不世  
筭畧無方方欲扶危定傾興復京雒公不於此時立功  
效乃懷猶豫恐禍不旋踵矣顯即出迎太祖禦遂入鎮  
雍州

齊王憲從武帝伐齊為前鋒進克鄴城齊任城王湝廣  
寧王孝珩據信都有衆數萬武帝復詔憲討之仍令齊  
王手書與湝曰朝廷遇緯甚厚諸王無恙叔若釋甲則  
無不優待湝不納乃大開賞募多出金帛沙門求為戰士者

亦數千人憲軍過趙州潛令間諜一人覘視形勢候騎執以白憲乃集齊之舊將徧示二人又謂之曰吾所爭者大不在汝等今放汝還可即充我使乃與一書

書具傳檄

門其末云交兵命使古今通典不俟終日所望知幾也俄而潛領軍尉相願以衆降相願潛之腹心也衆駭懼因破之擒潛

隋李雄字毘盧初仕後周為上儀同從行軍總管韋孝寬畧定淮南雄以輕騎數百至硤口說下十餘城拜濠

州刺史

元諧為上大將軍總兵討吐谷渾俘斬萬餘於是移書諭以禍福其名王十七人公侯十三人各率其所部來降

劉權大業中為南海太守行至鄱陽會羣盜起不得進詔令權召募討之權率兵與賊相遇不與戰先乘單舸詣賊營說以利害而羣盜感悅一時盡降附帝聞而嘉之

唐河間王孝恭為南山道招慰大使自金州出於巴蜀招撫以禮降附者三十餘州遷襄陽道招慰大使自行臺尚書左僕射出時荆襄雖定嶺表尚未悉平孝恭分遣使人撫慰嶺南四十餘州皆來款附

薛萬淑為右領軍鎮黃龍時突厥之亂也萬淑遣契丹渠帥貪沒折諷諭北狄東國威靈奚霫室韋等十餘部皆來降附太宗下書褒美

劉師立為岐州都督上書請討吐谷渾書奏未報便遣

使間其部落諭以利害多有降附列其地為開橋二州  
又有党項首領拓拔赤辭感悟率其種落內屬太宗嘉  
之拜赤辭為西戎州都督

侯君集為交河道行軍總管擊高昌麴智盛頓軍城下  
諭以禍福智盛致書於君集曰有罪於天子者先王既  
咎深譴積身已喪亡智盛襲位未有愆闕所冀尚書赦  
之君集報曰若能悔禍宜束手軍門智盛猶不出後計  
無所出遂開門出降

薛萬備為阿史那杜爾行軍長史杜爾破龜茲于闐王  
伏闐信大懼使其子以駝馬三百匹餽軍及將旋師萬  
備謂杜爾曰今者既破龜茲國威已振請因此機願以  
輕騎襲取于闐之王杜爾乃遣萬備率五十騎抵于闐  
之國萬備陳國威靈勸其入見天子伏闐信於是隨萬  
備來朝

李勉為汴宋滑豪河陽等道節度使德宗建中三年淄  
青李納叛使勉誘說之納許降乃遣其判官檢校戶部



郎中房說以其母弟經男成務朝於京師

嗣曹王皋為江南西道觀察使時李希烈反皋乃遣伊慎王鐔將兵進圍安州州城阻湓水為固攻之累日不下希烈遣其甥劉戒虛將步騎八千來援皋乃遣李伯潛分兵迎擊之戰於應山獲戒虛及大將二人裨將二十人斬首千餘級遂面縛戒虛等示於城下皋使人說之賊曰得大將及賓佐一二人為信當以城降皋乃遣王鐔馬彛縋城而入城中皆大呼乃出降希烈又遣將

將兵援隨州舉又令伊慎邀擊於鴈鄉大破之乃復平  
靜白鴈等關希烈甚畏之

伊慎建中末為安州刺史時李希烈死李惠登為賊守  
隨州慎飛書招諭惠登隨以城降因密奏惠登可用詔  
授隨州刺史

馬燧為奉誠軍及晉絳慈隰節度并管内諸軍行營副  
元帥與侍中渾瑊及鎮國軍節度駱元光等合軍河中  
李懷光次於長春宮懷光將徐庭光以兵六千守宮城

禦備甚嚴燧度長春不下則懷光自固攻之曠日持久  
所傷必甚乃挺身至城下呼庭光庭光素憚燧威名拜於  
城上燧度庭光心已屈乃徐謂之曰我來自朝廷可西  
面受命庭光復拜燧乃喻之曰公等皆朔方將士祿山  
已來首建大勲四十餘年功伐最高奈何棄祖父之勲  
力背君上為滅族之計耶從吾非止免禍富貴可圖也  
賊徒皆不對燧又曰爾以吾言不誠今相去不遠數步  
爾當射我乃披襟示之庭光感泣俯伏軍士亦泣下先

一日賊焦籬堡守將尉珪以兵三千因堡降燧庭光東道既絕乃率衆出降燧以數騎徑入城處之不疑莫不畏服衆大呼曰吾輩復得為王人矣渾城繇是服燧私謂參佐曰予嘗謂馬公用兵與予不相遠但驚怪累敗田悅今觀其行兵料敵吾不迨遠矣

范希朝為朔方靈鹽節度使突厥別部有沙陀者北方推其勇勁希朝誘致之自甘州舉族來朝歸衆且萬人其後以之討賊所至有功

李光顏討淮西敗吳元濟之衆三萬於郾城其將張伯良奔於蔡州殺其賊十二三獲馬千匹器甲三萬聯皆畫雷公符仍書云速破城北軍尋而郾城守將鄧懷金請以城降光顏許之而收郾城初鄧懷金以官軍圍青陵城絕其歸路懷金懼謀於郾城令董昌齡昌齡母素誠昌齡因此勸懷金歸歟於光顏且曰城中之人父母妻子皆質於蔡州如不屈而降則家盡屠矣請來攻城我則舉烽求救救兵將至官軍逆擊之必敗此時當以

城降光顏從之賊果敗走於是昌齡執印帥吏列於門外懷金諸將素衣倒戈列於門內光顏受降乃入羅城其城自壞五十餘步

李愬為唐鄧節度使討淮西吳少誠子壻董重質性勇悍識軍機善用兵及元濟拒命重質又為謀主領大軍當王師連歲不拔皆重質之謀也元和十二年宰相裴度督兵至郾城元濟懼乃悉發左右及守城之卒委重質而拒度愬乘虛入蔡既擒元濟重質之家在蔡愬乃

安卹之仍使其子持書禮以招重質見其子知城已陷  
及元濟囚窘之狀乃慨然以單騎歸愬白衣叩伏愬揖  
登階待以賓禮與之食憲宗欲殺之愬奏許以不死而來  
降請免之且乞於本軍驅使

嚴綬為荆南節度有叙州蠻酋張伯請殺長史據辰錦  
諸州連九洞以自固詔綬出兵討之綬遣部將李志烈  
齎書曉諭盡招降之

後唐李嚴為客省使隨郭崇韜征蜀為三川招撫使嚴

與先鋒使康延孝將兵五千先驅閣道或馳以詞說或威以兵鋒大軍未及所在降下延孝在漢川王衍與書曰可請司空先來餘即舉城納款衆咸以討蜀之謀始於嚴衍以甘言將誘而殺之欲不令往嚴聞之喜即馳騎入益州衍見嚴於母前以妻母為託即日引蜀使歐陽彬迎謁魏王繼岌

晉劉處讓為左監門衛上將軍充宣徽南院使天福二年范延光據城反高祖命宣武軍節度使楊光遠領兵



討之處讓詔與光遠同參議軍政四年冬范延光將謀  
納降尚或遲留處讓首入其城以禍福諭之延光乃降  
周曹英為侍衛親軍馬步軍指揮使兗州行營廣順二  
年正月上言十八日至任城喚得縣令胡延禧分付勅  
榜招安百姓其山寨民尋時下山歸業見更令招安次  
又上言按問得降人及兗州副都指揮使康海超來投  
俱說賊城人心離散慮慕容彥招逃竄已牒鄰道防備  
掩殺其康海超且留於城下說誘賊黨俟三五日遣赴

京師



冊府元龜卷四百二十六